

### Headlines

1. महाकुम्भ मेला 2025 थां पैहले प्रधानमंत्री नरेंद्र मोदी होरें प्रयागराज च केई सारे विकास प्रोजेक्टें दा उद्घाटन कीता।
2. विदेश मंत्री डॉ. एस. जयशंकर होरें लोकसभा च आखेआ जे भारत पाकिस्तान कन्नै खरे रिश्ते चाहंदा ऐ पर एह सब आतंकवाद थां मुक्त माहौल च होई सकदा ऐ।
3. उपराज्यपाल मनोज सिन्हा होरें विद्यार्थीं गी आखेआ जे उनेंगी अपने सुखने गी पूरा करने आस्तै सख्त मेहनत करनी लोडचदी। उनेंगी बड्डा सोचना चाइदा ते अपने पर भरोसा होना लोडचदा।
4. चेयरमैन हुंदे खिलाफ आहने गेदे अविश्वास प्रस्ताव खिलाफ राज्यसभा च शोर शराब जारी रेआ। कार्रवाई 16 दिसंबर तगर स्थगित करी दिती गई ऐ।
5. संसद पर होए दे हमले दी बारे गंड दे मौके उपराष्ट्रपति, प्रधानमंत्री ते सांसदें शहीदें गी श्रद्धांजलि भेंट कीती।

<><><><><><>

### PM-Kumbh Projects

प्रधानमंत्री नरेंद्र मोदी होरें अज्ज आखेआ जे महाकुम्भ 2025 इकजुटता ते समानता दा इस चाल्ली दा महायज्ञ होग जेड़ा राश्ट्र दा मार्गदर्शन करोग ते इस बारै दुनिया भर च चर्चा कीती जाग। प्रधानमंत्री होर प्रयागराज दे संगम च महाकुम्भ 2025 दा औपचारिक उद्घाटन करने मगरा इक जनसभा च बोला करदे हे जेड़ा अगले बरे 13 जनवरी थमां अधिकारिक तौर पर शुरू होग ते 26 फरवरी तगर जारी रौहग। इस मौके पर प्रधानमंत्री होरें करीब 6 ज्हार 670 करोड़ रुपें दी विकास परियोजनाएं दी शुरूआत कीती। एहदे च बुनियादी ढांचे गी बढावा देने े प्रयागराज विजन कुसै रूकावट दे राबता कायम करने लेई बक्ख-बक्ख रेल ते शिडक परियोजनां शामिल हियां। इस मौके पर बोलदे होई प्रधानमंत्री होरें आखेआ जे महाकुम्भ दौरान प्रयागराज दी धरती पर इक नमां इतिहास बनोग जेड़ा हर चाल्ली दी असमानता गी खत्म करोग। एह “एक भारत श्रेष्ठ भारत” दे असली मूल्य दा ब प्रतिनिधित्व करदा ऐ ते राश्ट्र दा मार्गदर्शन करदा ऐ। एहदे शा पैहले प्रधानमंत्री नरेंद्र मोदी होरें मंदरें दे गलियारें दा बी उद्घाटन कीता। एहदे अलावा स्वच्छ ते निर्मल गंगा प्रति अपनी प्रतिबद्धता मताबक उनें गंगा नदी च जाने आले नालें दे पानी गी रोकने सरबन्धी ट्रीटमेंट प्रोजेक्टें दा बी उद्घाटन कीता।

<><><><><><>

### Jaishankar India Pak

विदेश मंत्री डॉ. जयशंकर होरें अज्ज लोकसभा च आखेआ जे भारत पाकिस्तान कन्नै अच्छे सरबन्ध बनाना चाहंदा ऐ जेड़े आतंकवाद थमां मुक्त होन, पर जेकर ओह अपने पिछले वर्ताव च बदलाव नेई करोग तां दपिक्ख्या सरबन्धें पर एहदा माड़ा असर पौग। प्रश्नकाल दे मौके पर मंत्री होरें आखेआ जे 2019 च पाकिस्तान आसेआ लैते गेदे किश फैसलें दे कारण बपार सरबन्धी रिश्तें च रूकावट आई ही। एह गल्ल उनें इक सवाल दे परते च आक्खी। मंत्री होरें आखेआ जे भारत नै म्हेशां थमां गै एह गल्ल साफ आक्खी ऐ जे एह पूरी चाल्ली पाकिस्तान पर निर्भर करदा ऐ जे ओह अपनी रौह च बदलाव आहनन जेकर पाकिस्तान अपना रौह नेई बदलदा ते बशक्क एहदा दौनें मुल्लें दे सरबन्धें पर असर पौग। इत्ये एह दस्सना लाजमी ऐ जे केंद्र सरकार आसेआ जम्मू-कश्मीर चा दफा 370 गी रद्द करने परैत पास्तिन कन्नै बपारिक रिश्तें त्रुटी गे हे।

<><><><><><>

### LG-School

उपराज्यपाल मनोज सिन्हा होरें विद्यार्थीयें गी आखेआ ऐ जे ओह अपने आपा पर भरोसा रक्खन ते अपने सुखने गी साकार करने आस्तै सख्त मेहनत करना। उपराज्यपाल होरें एह गल्ल जम्मू यूनिवर्सिटी दे जनरल जोरावर सिंह आडीटोरियम च इक निजी समारोह गी संबोधित करदे होई आक्खी। उनें आखेआ जे युवा डर त्राह ते भ्रष्टाचार मुक्त ते विकास आधारित समाज चाहंदा ऐ।

<><><><><><>

## SIH-IIT Jammu

स्मार्ट इंडिया हैबिथान एसआईएच दा ग्रैंड फिनाल कल आईआईटी जम्मू च सफलतापूर्वक सम्पन्न होई गेआ। इस कार्यक्रम च मुख्य भरै दिएं 28 टीमें हिस्सा लैता। इनें टीमें गी नैशनल क्रिटिकल इनफरमेशन इनफ्रास्टक्चर प्रोटेक्शन सेंटर आस्सेआ साइबर सुरक्षा संबंधी चुनौती दिती गई। 6 टीमां जेतु रेइयां। हर इक गी 1-1 लक्ख रपे दी राशि ते प्रमाण पत्र थोआ। एह पुरस्कार आईआईटी जम्मू दे निदेशक प्रो. मनोज सिंह गौर होरें दित्ते। स्हाडे जिला संवाददाता अंकुश शर्मा हुंदे कन्नै गल्लबात करदे होई इस कार्यक्रम दे इक विजेता नै आखेआ।

<><><><><><>

## Kathua-Homeopathy College

जम्मू कश्मीर अपने पैहले सरकारी होमोपैथी मैडिकल कालेज दी स्थापना कन्नै सेहत ते चिकित्सा शिक्षा दे क्षेत्र च इक मील दा पत्थर हासल करने आला ऐ। आकाशवाणी जम्मू दे संवाददाता दी रिपोर्ट मूजब कहुआ जिले दे रखखरी इलाके च 57 कनाल ते 1 मरले च फैली दी इक थाह दी पंछान हौमोपैथी कालेज दी स्थापना लेई कीती गई ऐ ते उत्थें नमीं इमारत बनने तगर कठुआ मैडिकल कालेज गै क्लासां लोआइयां जांगन। आयुश मंत्रालय नै इस परियोजना गी मंजूरी देई दिती ऐ। एहदे पर 80 करोड़ रपे दी लागत औग। क्लासों दी शुरूआत मजूदा सत्र 2024-25 थमां शुरू होग। कालेज गी अपने पैहले बरें च 63 सीटें लेई मंजूरी देई दिती गई ऐ। जेहदे च अधिक तौरा उप्पर कमजोर तबकें लेई आरक्षण बी शामिल ऐ। 15 फीसदी सीटें गी केन्द्र आस्सेआ भरेआ जाग। जिसलै के जम्मू कश्मीर बोर्ड ऑफ प्रोफेशन एंट्रेंस इक्जामिनेशन बाकी सीटें लेई चयन करग।

<><><><><><>

## Udh. Muft Bijli Yojana

राज्य बिजली मैहकमे नै अज्ज उधमपुर दे डी.सी कार्यालय परिसर च पी.एम सूर्य घर मुफ्त बिजली योजना बारै जागरूकता कार्यक्रम शुरू कीता। इस कार्यक्रम राहें इस योजना बारै सारें गी दस्सने लेई बड़ी मती गिनतरी च मकामी लोकें गी सद्देआ गेआ। पी.एम सूर्य घर मुफ्त बिजली योजना इक सरकारी योजना ऐ जिसदा मकसद पूरे भारत च घरें गी मुत बिजली उपलब्ध करोआना ऐ। इस योजना तैहत घरें गी उंदी छत्तें पर सोलर पैनल लाने लेई सब्सिडी दिती जाग। इस कार्यक्रम दौरान मैहकमे दे अधिकारियें अक्षय उर्जा दी अहम भूमिका उप्पर जोर दित्ता ते उधमपुर दे सारें लोकें गी सोलर टेक्नॉलोजी अपनाने लेई आखेआ।

<><><><><><>

## Parliament-Session

सभापति जगदीप धनखड़ हुंदे खलाफ अविश्वास प्रस्ताव पर विरोधी धड़े दे हंगामे दे मगरा अज्ज राज्यसभा 16 दिसंबर तोड़ी स्थगित करी दिती गई। उपराष्ट्रपति जगदीप धनखड़ होर राज्यसभा च सभापति न। कांग्रेस दी अगुवाई च विरोधी पार्टियें धनखड़ होरें गी हटाने दा प्रस्ताव पेश करने दा नोटिस पेश कीता ते उंदे पर पक्षपात दा आरोप लाया। दपैहरी थमां पैहले आहले सत्र दौरान सत्ताधारी पक्ष केई सांसधें कांग्रेस दे नेताएं पर धनखड़ हुंदा अपमान करने दा इल्जाम लाया ते आखेआ जे विपक्षी पार्टी नै इक करसान दे पुत्तर दा अपमान कीता ऐ। सभापति होरें राज्यसभा च विपक्ष दे नेता मल्लिकार्जुन खड्गे होरें गी बोलने दा मौका दित्ता। खड्गे होरें दावा कीता जे सभापति होरें पक्ष दे सांसधें गी मता समा देआ रदे हे ते कांग्रेस पार्टी दा अपमान होआरदा हा। धनखड़ होरें खड्गे होरें गी ते सदन दे नेता जगत प्रकाश नड्डा होरें गी गल्लबात करने लेई अपने चैंबर च सद्देआ।

<><><><><><>

## Parliament-Attack Anniversary

राष्ट्र अज्ज 23 बरें पैहले 13 दिसम्बर 2001 गी आतंकवादी हमले दरान संसदी गी रक्षा करदे होई शहीद होए दे सुरक्षा कर्मियें गी श्रद्धांजलि देआरदा ऐ। राष्ट्रपति द्रौपदी मुर्मू होरें आतंकवादी हमले दरान संसद दी रक्षा करदे होई अपनी जान देई देने आले बहादुर शहीदें गी श्रद्धांजलि भेंट कीती। अपने इक सोशल मीडिया पोस्ट च राष्ट्रपति होरें सुरक्षा कर्मियें दी हिम्मत ते निरस्वार्थ सेवा गी चेता करदे होई आखेआ जे ओहू म्हेशां देश गी प्रेरित करदे रौहंगन। उपराष्ट्रपति जगदीप धनखड़ लोकसभा स्पीकर ओम बिरला, प्रधानमंत्री नरेन्द्र मोदी ते केन्द्री गृहमंत्री अमित शाह होरें बी शहीदें गी श्रद्धांजलि भेंट कीती। उपराज्यपाल मनोज सिन्हा होरें बी संसद हमले च शहीद सुरक्षा कर्मियें गी श्रद्धांजलि भेंट कीती। उनें आखेआ जे देश सदा उंदे इस बलिदान गी चेता रक्खोग।

<><><><><><>

## LS-Constitution Debat

देश च संविधान गी अपनाने दे 75एं बरे दी शुरूआत दे मौके उपपर लोकसभा च संविधान उपपर 2 दिनें दी बैठस शुरू होई गई। लोकसभा दे सूचिवद्ध एजेडे मताबक भारत दे संविधान गी अपनाने दी 75मीं बरेगंड पर खास चर्चा होग। रक्षा मंत्री राजनाथ सिंह होर लोकसभा च संविधान उपपर बैठस शुरू कीती। उनें आखेआ जे संविधान मुख्य दे नागरिकता मुल्ले दी अभिव्यक्ति ऐ। प्रधानमंत्री नरेन्द्र मोदी हुंदा कल लोकसभा च संविधान बारे 2 दिनें दी बैठस दा परता देने दी मेद ऐ

<><><><><><>

## Samba-Livestock Cencus

जिला साम्बा च चला'रदी डंगरें दी गणना, आवेदन दे राहें ते घर-घर जाइयै 16 प्रजातियां जिंदे च मज, भिड़ू, बकरी, याँक ते होरनें डंगरें बारै आंकड़े कट्टे करने दे राहें ऑनलाइन कीती जा'रदी ऐ। स्हाळे जिला संवाददाता कन्नै गल्लबात करदे होई साम्बा दे चीफ एनिमल हजबेंडरी अफसर डॉ. राहुल देव होरें 21मीं इस गणना दे महत्व बारै दस्सेआ। उनें आखेआ जे सरकार दी सारी योजनाएं इनें आंकड़ें दे आधार उपपर तैयार कीती जंदियां न। उनें मकामी लोकें गी इस गणना च सहयोग देने लेई आखेआ।

<><><><><><>

## Cyber Security Workshop

जिला किशतवाड़ दी जम्मू-कश्मीर पुलस नै डाइट किशतवाड़ कन्नै रलियै डाइट परिसर च राश्ट्री साइबर सुरक्षा जागरूकता बारै इक दिनै दी कार्यशाला दा आयोजन कीता। इस कार्यक्रम च किशतवाड़ दे हायर सेकेंडरी स्कूल बॉयस ते हायर सेकेंडरी स्कूल गर्ल्स दे बच्चे बधी-चड़ियै हिस्सा लैता। सूचना प्रौद्योगिकी मंत्रालय आसेआ सूचना सुरक्षा शिक्षा ते जागरूकता कार्यक्रम दे हिस्से दे तौरा पर आयोजित इस पैहलकदमी दा मकदास प्रतिभागियें गी साइबर सुरक्षा, प्रौद्योगिकी दा इस्तेमाल ते सुरक्षित ऑनलाइन मौजूदगी सुनिश्चित करने बारै जानकारी देना हा। इस कार्यशाला दी खास गल्ल ऑनलाइन सुरक्षित किस चाल्ली रौहना ऐ, सरबन्धी सत्र हा जेडा डाइट किशतवाड़ दी आई.सी.टी लैब च आयोजित कीता गेआ। प्रतिभागियें गी गलत जानकारी, फर्जी चीजें कोलां सतर्क रौहने दे कन्नै-कन्नै आउटरीच लेई सोशल मीडिया प्लेटफार्म दा फायदा लैने लेई प्रोत्साहित बी कीता गेआ।

<><><><><><>

## Weather

मौसम विभाग नै पेशगोई कीती ऐ जे जम्मू-कश्मीर च 21 दिसंबर तोड़ी मौसम खुशक रौहग। हालांकि अगले त्र'ऊं-च'ऊं दिनें दौरान खित्ते च ठंड दी स्थिति बनी दी रौहग। मौसम विभाग दे इक अधिकारी दी जानकारी मूजब 15 दिसंबर गी बहल छाए दे रौहने दी संभावना दस्सी गई ऐ जिसले के 16 थमां 17 तरीक मौसम आमतौरा पर खुशक रौहग। तोआई ताजा बर्फबारी दे मद्देनजर ते उच्ची धारें दी शिड़कें पर बर्फीली स्थिति गी दिखदे होई अधिकारियें सैलानियें, यात्रियें ते गड्डी चालकें गी हिदायत दिती ऐ जे ओह प्रशासन ते ट्रैफिक मैहकमे दी सलाह दी पालमा करन तां जे कुसै बी चाल्ली दी असुविधा थमां बचेआ जाई सकै।

<><><><><><>

## India Women Hockey

हॉकी च भारत नै कल रातीं ओमान दे मस्कट च चला'रदी महिला दी जुनियर एशिया कप च अपने चौथे पूल-ए मैच च थाईलैंड गी 9-0 कन्नै हराई दिता। इस जित्त कन्नै भारत इस प्रतियोगिता दे सैमीफाइनल च पुज्जी गेआ ऐ। भारत दा अगला मकाबला कल सैमीफाइनल च जापान कन्नै होग।

<><><><><><>